

**ALEXANDRO  
SCABIA NUNC  
PRIMUM SACRA  
SOLEMNITER  
LITANTI HOC...**

---

Carlo Luigi Salani



# ALEXANDRO SCABIA

NUNC PRIMUM SACRA SOLEMNITER LITANTI

HOC CARMEN

CAROLI ALOYSII SALANI

IN SEMINARIO PATAVINO

EGREGII RHETORICES MAGISTRI

JOANNES BAPTISTA BOLOGNINI

CONDISCIPULUS ET AMICUS

GRATULABUNDUS

D. D. D.

7.

PATAVII TYP. SEMINARII MDCCCLXV.

Jo. Bapt. Bolognin cur.

## B. GREGORIUS BARBADICUS

CATHOLICAM RELIGIONEM

PRÆSERTIM IN GRÆCIAM ET IN ORIENTEM INVEHERE

SUMMOPERE STUDET (1)

---

**P**ulcra quidem Euganeis surgentia munera campis  
Gregorii exhilarant pectus, curasque rependunt;  
At non ulla quies animo, qui maxima volvit,  
Quique piis totum studiis complectitur orbem.  
Usque tuo sed enim gremio miseratur ademptos,  
Religio, natos crudâve tyrannide pressos:  
Sive illos recolat, quos dira obfuderit Arctos  
Jampridem tenebris, seu quos terit Anglia bello,  
Quosve aliis sparsos deplorat Hibernia terris.

Sæpius ille Deo supplex gemitusque precesque  
Integrat, atque optat rebus succurrere egenis:  
Tum felix, si quem, patriis e finibus actum,  
Hospitio foveat, pressetque ad pectora, et ægri  
Fletibus ipse suas lacrymas commisceat æger.  
Sed cor Gregorii stimulis gravioribus urget  
Quæ grajas syriasque premit sors effera gentes.  
Turcica nam feritas, nullis satiata tropæis,  
Christiadûm quacumque ardet restinguere nomen,  
Sævior inque dies uberrima regna cruentat  
Cædibus innumeris, veterique cupidine flagrans  
Impatiensque inhiat reliquis atque imminet oris.  
Quæ pius assiduâ Pastor quum mente volutet:

« O patria, exclamat, maris o fortissima quondam  
 Regina Hadriaci, quæ mille superba carinis  
 Rettuleris toties Orientis ab æquore palmas,  
 Nobisque una diu junxisti fœdere Achivos;  
 Cur modo flaccescunt tua circum tempora lauri?  
 Cur tibi dextra riget? quid nunc deferbuit ardor,  
 Quo tot in arma acies pro religione ruebant,  
 Quo fulmen belli Zenus, quo Victor ovantum  
 Agmina Turcarum venetis ursere catervis?  
 Surgite nunc iterum, cives, revocate feroces  
 In nova bella animos, patriamque fidemque juvate.  
 Cernitis, unde prius Fidei lux alma refulsit,  
 Qua modo inhorrescat tetra caligine tellus?  
 Cernitis ut domitæ genti, si turpia spernat  
 Jura, tyrannorum stricto manus ense minetur?  
 Cernitis ut, grave discidium errorenique perosa,  
 Ad nos devinctas protendat Græcia palmas?  
 Vos hujus tangat fletus; vos impia forti  
 Frangite vincla manu, tortorum frangite tela,  
 Jam satis innocuo rorantia sanguine! Et ipse,  
 Ipse ego quam lætus, quantâ spe fervidus illuc  
 Appulerim, et dilecta, meis comitatus alumniis,  
 Arva peragrarim vestris patefacta triumphis!  
 Ipse tibi afflictæ quot vellem adjungere natos,  
 Religio, atque novis tibi tollere finibus aras!  
 Turcarum tunc ipsa cohors mirata stupebit  
 Qua luce Hadriacûm victricia signa nitescant:  
 Divinis juga tunc Libani Solymæque resultent  
 Laudibus, atque crucem Sophiæ de turre micantem  
 Tunc rursus tremulis depinget Bosphorus undis.  
 O cives, nisi tanta animos percellit avorum

Gloria; tutandæ Fidei nisi tantus adurget  
 Vos amor: ecce brevi (infandum Deus obruat omen!)  
 Barbaricæ vada nostra gement sub pondere classis,  
 Diris atque manus dabit hostibus Hadria victas! »  
 Talia corde movens, Venetùmque Ducumque potentum  
 Exstimulat dictis animos. Sed fluxerat illa  
 Virtus, qua fremuit rubuitque ad Echinadas æquor;  
 Aut si posset adhuc, residum discordia Regum  
 Magnanimos Venetùm invidiosa retunderet ausus.  
 Ergone perpetuo caris prohibebitur arvis?  
 Nec segetis tantæ dabitur spes ulla metendæ  
 Gregorio? Desint equidem qui mœnia celsis  
 Molibus evertant, inimicaque corpora fundant;  
 Majores sed diva Fides progignet aletque  
 Heroas, generosa feris qui pectora inermes  
 Hostibus objectent! — Certatim has pergite ad ædes,  
 Quois tantus nuper Patavi decor additus urbi,  
 Illyricis, juvenes, venetisque huc pergite ab oris:  
 Hic, duce Gregorio, varias perdiscite linguas,  
 Quarum ope vos Asia agnoscet, vos Græcia cives!  
 Ille hic, quo fervet, vobis afflabit amorem,  
 Ardua conari et suprema pericla subire  
 Vos ille erudiet! — Jam vocibus excita Patris  
 En delecta manus juvenum dat vela per altum,  
 Jamque cruentatas lauros spe præcipit ardens.  
 O ut sollicitis animis prospectat euntes  
 Gregorius sequiturque prece! atque sibi ipse videtur  
 Ire comes natis, simul et per graja vagari  
 Littora, threiciisque simul discurrere campis,  
 Per Phrygiæ valles, syriasque errare per urbes;  
 Et nunc sopitis veteres in cordibus ignes

Eloquio excire, aut fletum abstergere dolentum,  
 Nunc tortorum ante ora rapi, impavideque fateri  
 Christiadûm nomen. — Jam nuntia fama reportat  
 Natorum laudes: plaudit stupefacta verendo  
 Roma Duci, athletasque novos hilarata salutat.

Quis tormentorum strepitus, festusque tubarum  
 Hadriaco interea diffunditur æquore clangor?  
 Quæ nostras, lætis ornata insignibus, oras  
 Ingreditur classis? Veneto decorata Leone  
 Navibus e summis fluitant vexilla per auras:  
 Jamque urbe occursant, vario splendore nitentes,  
 Et longo antevolant agiles ex ordine cymbæ,  
 Densique insolitæ cives spectacula pompæ  
 Littoribus cunctis plausu fremituque tuentur.  
 Ecce triumphatis Pelopis de mœnibus audax  
 Maurocenus adest; spoliisque potitus opimis,  
 Europæ soluisse metus, soluisse catenas  
 Grajorum gaudet. Tibi quod pernobile sertum  
 Exornat canos, Hadriæ Regina, capillos!  
 Te libertatis columen, te prædicet unam  
 Infandi ultricem nunc rursum Europa tyranni!  
 Perge, age, et optatum, quod prisca inceperat ætas,  
 Perfice opus! cunctas tenet hæc fiducia mentes,  
 His votis cuncta ora sonant. Non attamen ulli  
 Palma resurgentis patriæ tam clara renidet,  
 Quam Barbadico, nec spes movet altior ullum;  
 Quippe per eoas justis sibi pandier armis  
 Cernit iter terras, eversoque objice cernit  
 Fraterna Hesperiiis laturos oscula Grajos,  
 Quos unus conjunget amor, quos una fovebit  
 Relligio mater. Flagranti in pectore curas

Hinc Præsul versare novas: hinc turba suorum  
 Ad debellatos properare frequentior agros;  
 Victorisque sequens tuto vestigia gressu  
 Colligere innumeras Patrique referre coronas. —  
 Fortunate nimis, Pastor, cui lumina somnus  
 Clauserat extremus, dum magnæ nuncia lucis  
 Tam rutilans grajis aurora emergeret undis!  
 Nec nisi sidereâ, unde omnis dolor exsulat, arce  
 Vidisti quæ immanis hyems diuturna que apricis  
 Finibus ingruerit rursum, quibus horrida nimbis  
 Nox jubar exoriens prætexerit! Alta tuarum  
 Rore precum, permulta illis succrescere in arvis  
 Germina vidisti Fidei, sed atrocibus usque  
 Percita turbinibus: vidisti haud latius inde  
 Barbaricas ferri, sed non mansuescere, tigres.  
 O tu, quem genus in miserum flammata voluntas  
 Tam sæpe impulerat, nunc nunc mage fervida porge  
 Vota Deo! Spes quanta vide quantusque fatiget  
 Pectora nostra pavor! Numerat dum læta per agros  
 Religio Armenios redeuntem ad pascua turbam:  
 Dum ripæ Euphratis, Ninivis dum rudera sacras  
 Christiadûm ingeminant voces: dum vallibus Hæmi  
 Bulgara progenies, longo expectrecta sopore,  
 Excutit antiquam labem, divæque Parentis  
 Tendit in amplexum; quam late squallet et horret  
 Ad Libanum campus <sup>(2)</sup>! Glæbæque viæque tepescunt  
 Sanguine adhuc fluvii que rubent, quem barbarus hausit  
 Drusorum mucro. Discerpta cadavera tabent  
 In cumulos congesta: voracibus oppida flammis  
 Versa jacent, profugumque errans per littora vulgus,  
 Matresque, imbellesque senes, tenerique puelli



Auxilium inelamant. Pietas non irrita inarsit  
 Hesperiorum animis; sed tot cur arma Potentum  
 Dissocians livor vetuit consurgere in unum  
 Certam ad opem? Hi sibi dum trepidant, minitatur inultus  
 Nunc quoque inaccessio Libani de vertice Drusus,  
 Detersumque agitans gladium, conamina ridet  
 Vindicis ambigui. Ah! nimios, dulcissime Pastor,  
 Tu precibus depelle metus! Non sanguine iniquam  
 Abstergi cupimus cædem, non funere funus:  
 Ast unum optamus, diris ut decidat ensis  
 Carnificum dextris, insontum et jura tueri  
 Gallam ne pigeat pubem. Nisi clara ruisset  
 Urbs Venetum, socias illuc quot et ipsa phalangas  
 Mitteret! Interitûs haud nescia Gallia tanti,  
 Saltem ne renuat veneto succedere amori  
 In Syrios, patriæque tuæ saltem ista sepulcro  
 Munera ferre velit! — Redeant simul otia pacis  
 Mœstas in sedes, durisque coercita vinclis  
 Barbaries jaceat; quo mox fulgore coruscet  
 Circum ibi Relligio! rursus mille inclyta templis,  
 Hæc sibi conspiciet genibus procumbere natos,  
 Quos dolus abstulerat, quos presserat atra tyrannis;  
 Atque utinam, Pater, hoc nostro contingat in ævo,  
 Impleat ut Fidei tantus tua vota triumphus!

*Mense Junio MDCCCLXI.*

(1) Vide Ricchini, Vita B. Gregorii Barbadiei, Lib. II, cap. I.

(2) Ob immanissimas Christianorum strages in Syria anno MDCCCLX a Drusis editas.



Sch.